

## Dumonda tenor l'iniziativa dal pievel "Per ina chatscha etica che sa cumporta cun la natira"

### Dumondas d'iniziativa valaivlas

<sup>1</sup> DI 2	Scumond da la chatscha da guetta e da la chatscha cun traplas
DI 3	Scumond da la chatscha d'utschels
DI 4	Scumond general da chatscha a partir dal 1. da november per tut ils animals selvadis danor il tshiev
DI 5	Cumposiziun paritetica da la cumissiun da chatscha (chatschaders/protecturs d'animals per l'ina e nunchatschaders per l'autra)
DI 6	Limitas da l'alcohol en il sang cun ir a chatscha tenor la legislaziun davart il traffic sin via
DI 7	Examinaziun periodica da la qualificaziun per la chatscha e da la segirezza da culp sco er scumond da muniziun cun plum
DI 8	Scumond d'ir a chatscha cun uffants da main che 12 onns sco er scumond da motivar en scola per la chatscha
DI 9	Applicaziun restrictiva da sajettar singuls animals tras la surveglianza da chatscha en cas da donns da selvaschina extraordinaris

Las dumondas d'iniziativa menziunadas qua survart èn valaivlas er ord vista da la regenza. Ella propona dentant al cussegl grond da recumandar a las votantas ed als votants grischuns da las refusar.

### Dumondas d'iniziativa per part resguardadas

La regenza renconuscha che singulas dumondas da l'iniziativa èn tuttina motivadas en lur direcziuns. Ella ha perquai integrà las quatter dumondas d'iniziativa qua sutvart en ina furma adattada sco suonda en il sboz da consultaziun tar la revisiun parziala da la lescha chantunala da chatscha:

DI 2	Scumond da la chatscha da guetta cun excepziun da la surveglianza da chatscha e da las chatschadras e dals chatschaders autorisads da l'uffizi da chatscha e pestga, e quai en il territori d'abitadi, tar manaschis agriculs en vischinanza da vitgs sco er tar singuls edifizis.
DI 6	Exclusiun da la chatscha en cas d'incapacitad d'ir a chatscha conform a las prescripziuns pervia da l'influenza surproporzionala d'alcohol e da narcotics avant e durant la chatscha.
DI 7	Francaziun da l'obligaziun da tir per la chatscha tras l'obligaziun da relaschar normas da prestaziun liantas sin il stgalim da la lescha.
DI 7	Introducziun da ballas e da ballins senza plum, uschespert che quai po vegnir responsà per motivs da segirezza e sin fundament da ponderaziuns da la protecziun d'animals.

<sup>1</sup> DI = dumonda d'iniziativa

## Dumondas d'iniziativa nunvalaivlas

DI 1	Protecziun da vatgas-tschierv purtantas e manadras e da vadels-tschierv sco er da chauras-chavriel purtantas e manadras e dad ansiels-chavriel
DI 4	Scumond general da chatscha a partir dal 1. da november per il tschierv
DI 5	Occupaziun paritetica da l'uffizi da chatscha e pestga (chatschaders/protecturs d'animals per l'ina e nunchatschaders per l'autra)

## Renunzia d'ina cuntraproposta

L'iniziativa dal pievel "Per ina chatscha etica che sa cumporta cun la natira" ha in fundament zunt critic envers la chatscha. Ella sa drizza da princip cunter la chatscha sco instituziun. Sustegnida vegn questa iniziativa da circuls che mettan en evidenza ch'els refusan la chatscha. Las singulas dumondas d'iniziativa èn pia er redigidas uschia, ch'i resta pouca libertad d'agir per far ina cuntraproposta directa adequata. Quai vala en spezial per il scumond da la chatscha da guetta e da la chatscha d'utschels, per la cumposiziun paritetica stricta da la cumissiun da chatscha e per il scumond d'ir a chatscha cun uffants da main che 12 onns. Ma er il scumond general da chatscha a partir dal 1. da november fin il cumenzament da la chatscha auta avess consequenzas decisivas. Cunzunt la chatscha bassa che dura oz fin ils 30 da november vegniss restrenschida considerablamain. Nunraschunaivla fiss schizunt in'applicaziun anc pli restrictiva da sajettar singuls animals tras la surveglianza da chatscha en cas da donns extraordinaris. La direcziun da tut questas dumondas d'iniziativa vegn refusada cleramain da la regenza. En cas da dumondas d'iniziativa talmain criticas envers la chatscha na resta nagina libertad d'agir pli per chattar in consens en il senn d'ina cuntraproposta directa. Per ils motivs menziunads desista la regenza da suttametter al cussegl grond – ensemen cun l'iniziativa – ina cuntraproposta directa, e propona da recumandar al pievel da refusar l'iniziativa.